

清容居士集

冊七

卷之四

四

清容居士集卷第三十九

元 袁 桷 譔

啓

上王尚書

伏以瞻望聲容幸有登龍之舊披陳悃悃慚無吐鳳之長圖鼓勇之新功冀鑄
頑於大造掃門受業槭櫨致詞切念桷生不逢時長始知學伶俚素緒綺襦紈
袴之習無聞零落青編漆簡汗書之藏曷見久知我輩固當投之濁流靖念斯
文豈宜束之高閣操觚而歎詎秉異心倚柱而歌終持正色胸臆結約肝膽輪
困惟其用拙於今將欲脩名於後載惟宏博世號殊科夷考哲賢咸稱異數當
紹聖之首創蓋以窮經爲先至大觀之重刪乃因代言而設唐朝疎略故退之
自笑其俳優宋制精詳至文公欲加以深厚維較藝於詞苑杳若探丸雖置身
於書林悉同畫餅苟非討論於暇日孰能敷奏於一時爰取舊規各成要覽涑
水之尚德筆纂金桴義山之好奇文編玉府初學記資騷人之屬對稽古編假

進士之試文博要之粹於丁年統類之塵於乙夜斯皆品節之效可爲區別之模然獨此書實難其例千門萬戶恍焉莫知所之六律五音聞之不喻其意至若寢門路鼓遂成君子之欺御庫神弓終藉老兵之對望洋之歎浩浩測海之智嚶嚶一物不知過亦多矣兩端而竭恥莫甚焉信知梓慶之巧專益訝庖丁之技異伏惟內翰尙書先生南州元老故國重臣望壓縉紳聊復浮湛於閭里文驚華夏未妨談笑於江湖恥申公之蒲輪便管寧之紗帽樹人爲急獎士尤先子誠齊人侈以都邑之富波及晉國化其潢汙之卑是用忘揣顙蒙惠徼恩育鉤玄提要在明公爲壯歲之筌蹄糾繆繩愆於後生爲百世之模範儻獲書傳於琬琰尤當襲藏於巾箱與汝共之深議中郎之隘非吾徒也尙祈夫子之憐欲報無從未言先愧

謝王尙書

拔叔度於幼童深慚非偶執李膺之下御竊喜同時敢緣擁篲之恭庸致摳衣之請袞褱語重茅塞心開伏念桷才實滯頑心尤退縮經箱塵寂莫逃家丞庶

子之譏藝苑雲蒸誠駭翰林客卿之對深恐凋零於冷譜固嘗論索於陳編志
不能以過人識不足以廣問戴盆望日勤無補於三餘坐井窺天智有鄰於五
技衡門感歎斗室屏營然而切觀盤盂之書致戒必謹韋弦之義繕性尤深苟
非取則於古經曷足振名於來世虛心實腹學始類於安弦閑邪存誠念實同
於執玉反觀典學之成訓爰採遜志之嘉名輒布請祈方虞僭躐豈駑駘已下
尚希一顧之功然爰居何知遽享九奏之禮寒窗展玩絢兮虹蜺之章素壁高
張森然神鬼之護論深蘊石字重璠璣已三復而吝消終九思而感併此蓋伏
遇某官言爲楷範道蘊經綸化閭里之澆風愍簪纓之弱息至誠樂易許傳新
著之書雅量恢弘不棄一偏之士遂令少賤屢獲親承桷敢不躬勵前聞仰稱
春秋之筆恪遵明訓益加歲月之功永依師門以堅壯志

與陳無我論樂府

伏承下教垂示雅詞退揆疎蕪敢居品藻復緣明命之重庸誦謏聞之迂執筆
覲慚通函偃伏切以陽春白雪之唱和者固希清廟朱弦之音知之尤寡歷觀

樂府之傑出悉爲詞林之緒餘良由萬物變化之愈多抑使五采章施之匪易
龍文被寶鼎雕刻益精天馬駕鼓車低徊滋窘貫珠之音空在累黍之器莫傳
吐角含商孰分其清濁析宮合徵莫辨其短長俚歌日煩古調幾廢留連桃葉
習晉世之風流淒切竹枝傳巴人之羈旅江南腸斷之句誰足近之涼州意外
之聲今無是也風聲鳥葉當由動植之可通霓裳羽衣徒詫神奇而自眩捨陽
關三疊之清怨變南鄉九闕之狹邪樂意生香寫天機之妙理山光水色換俗
子之凡容彼誇刻鵠之工詎悟承蜩之解精義無二至道不煩靖言思之孰可
繼者伏惟無我學士詞華泉湧言吐冰清飛星急羽之秋文傾上幕投綸沈鉤
之暇興滿南山每希白石道人之雅聲以成黃絹幼婦之佳制雪兒低唱未多
學士之風高墨客廣傳益見咸陽之紙貴桷尊聞唯謹快覩尤先用鹽洗金珠
未明於物理以蠡測海徒竊笑其心思狂斐莫裁涵容斯幸

回宗人袁慶遠教授

同源分流夙感陶公之詠劬躬燾後每懷韓子之碑均此靈根裊然望姓切以

經術基於博士衣冠盛於司空名節爲天下高言非其過歌詩著先人跡時與之俱念鼻祖嘗客於上虞而耳孫分胙於越土定居鄞水占籍開封西湖之佐蘇公風流儼在明招而從太史文獻有傳光于淳熙錮在嘉泰父子同館繼廣受之美談師生並朝陋禹宣之異禮京兆踵河南尹之祖武成均慕光祿公之家聲藐焉遺孤承此玄冑正倫之妬諸杜鑿地何心子雲之亡宅揚沂江有考車書一致江海相逢豈無它人因以合譜伏惟教授學士摛詞展世敬業守儒謂鄧林之廣敷本於一木探崑崙之無底散作羣川田歸於齊良非得已爰絕於漢或曰未然驗賦形之不齊審受氏之有自處祧唯謹繫世是嚴然而內舉避親昔者之邊幅合族戒令先王之準繩愧鸞鳩之圖南憫騏驥之伏櫪義之別王述趣乃不同康樂之愛謝莊心誠有得桷偶緣鉛槧久汙絲綸傳呼欣大小戴之稱臭味鄙南北阮之駸部室而得明月當道而逢夜光百世不遷揆宗支之非遠異姓爲後幸譜牒之可通敦敘攸同參承伊始永懷繡繒曷罄敷

陳

謝閣學士

東觀英游久欽諸老南州俚士獨守陳編念相望之邈然知無因而至爾何期
銓鑒俾預薦揚惟清切之司存實作成於俊乂王言之制曰七史官之長有三
風動四方必訓詞之溫雅詔垂萬世在書法之簡嚴維班馬之良不能繼獲麟
之筆而燕許之體難以推倚馬之才藝不兩能物無全美筆則筆削則削非曲
學之可爲見所見聞所聞恐直情而難致古有斗米而作傳近多千金以致詞
好惡成一己之私褒貶失當時之實掩長卷以竊歎抱遺經而自娛故魏收以
輕薄寡才咸稱穢史王通雖隱淪不仕獨著元經方今偉績無前太平有象大
禮略封禪之記純誠汰郊丘之儀聲教萬邦文質二代追皇猷創業之永傳丕
基嗣服之初必屬鴻文以揚駿德彰施作繪極妙巧於羣工雜比成音合天和
於衆耳拔犀之選非易聚毛之長亦難如橈者學不逮人志徒師古獻漢家三
雍之頌庶或可能續周書王會之篇良非所任揆小材之雕鏤幸大冶之作成
忘其顛蒙倍以踴躍茲蓋伏遇某官儒林冠冕文藪準繩桃李不言以成衆芳

之春松柏後彫而貫四時之氣官僚慎簡載籍肇新爭名於朝難後來之居上
脩身以道匪平進以依流深虞同升之譏上辱大賢之舉幸相知於氣味迄無
假於聲容桷敢不益勵討論上酬獎拔求識李邕之面當已有期效彈貢禹之
冠不幾於贅因風輸感執筆寫情歲律云更神休所屆庸致茵憑之禱密調鼎
鼐之和

賀鄧善之應奉

茲審講徹臯比班登龍尾早居三字極鉛槧之光榮爰作一經萃縑緗之芳潤
朝端色動江左文明切以詞章之體與政相通禮樂之宜隨時斯舉誠少近古
予以酌今釋訓聲牙固難返殷周之盛委心綺靡殆有鄰齊梁之風山東之詔
令溫然河西之璽書炳在往者諸賢不競故老云亡掇拾成言編聯賸語形模
近巧難逃脫鑿之譏刻畫傷和殊近鏤冰之累徒畫虎以類狗強令驚而隨雞
事非偶然時使之爾念欲復還其正氣抑嘗深探於陳編然而木人石腸難以
語經綸之事河目海口要當歸黼黻之才請誦所聞無出其右伏惟某官清言

古瑟雅製方壺冶百鍊之金而成雲雷之奇合八珍之味以調薑桂之美當下
帷之多暇每傾蓋而劇談意得忘筌神閒舐筆船容萬斛果自致於水中芝產
九莖宜載歌於殿內夙嘗相勉今匪共諛桷倚馬才疎屠龍技謬歸來之詞莫
擬遂初之賦或尋話茅舍於玉堂當廬遠想謹蔗漿於金盃冀保天和傾向之
忱敷陳莫旣

壽鄭潛庵

茲審玉宇金明蓬壺瑞藹數環六甲堯年已合於上元福擁三壬申旦適同於
洊九江湖相慶樽俎交歡伏惟內翰學士鬱鬱澗松昂昂野鶴辨排堅白共誇
麈尾之清言書喜硬黃猶習蠅頭之細字方窮太始之理以與造物者游陋絳
縣老人之年讀清溪道士之易踏龜殼而一笑持蟹螯以高歌夢繞故園壽客
相期於晚歲情親近局麴生肯負於良辰桷傾接維新扳援實舊黃絹幼婦之
詞莫擬子墨客卿之賦未能八千歲爲秋願致長生之祝六十養於國佇看優
禮之加薄物助誠副槭瀆聽

回交代潘檢閱

誦子墨客卿之賦竊有激昂聆諸老先生之言深相推挽審珠玉之將至愧糠粃之在前慶牘未遑巽函先枉伏惟內翰學士冰壺貯月水鑑懸秋下帷受徒有矻矻窮年之趣閉門樂道無憫憫望歲之憂追北渚之歎歌覽東齊之形勝斧藻樸素丹青炳靈相如封禪之書直譏其陋賈誼治安之策允謂可侔濯纓益振其高風結綬良非其雅志金馬門之待詔有類俳諧白虎觀之談經亦幾糅雜維茲冊府亶號詞林寶書如山汗簡若東方偃武修文之盛乃立經陳紀之初候日影於松階詞容潤色瞻天威於芝閣議許討論匪慎簡於英髦曷專美於治世除書一下輿論僉諧桷學匪適今才不逮古重以簪纓之舊猶工鉛槧之勤泉石寫心比元郎之漫仕山川感興追杜老之壯游過塵幼婦之辭重託聞孫之好有憚其旨不知所裁

回冷教授

仰南州之喬木美蔭獨存望西山之慶雲英光猶在居然傾蓋之幸辱以投函

之謙斧藻溢情丹青炳目切以取士之岐不一用儒之道實高賈誼少年憂國之策允著馬周逆旅入對之疏密諧法如牛毛賤若魚目將望然而引去寧挽之以必來方今人文交脩禮樂備舉金馬碧雞之頌可被弦歌赤麟白雁之祥宜書竹帛孰爲稱選僉謂當仁伏惟賢良學士溟海扶搖清秋沆瀣圓冠方屨儼魯國之舒徐漆簡汗書補羽陵之疎略寶氣橫鬱天葩芬奇方按軌以徐行差登途而捷進青氈舊物行廣高門白水同心益窺雅志幸雲龍之有應成針芥之相投遺以十朋之龜貴若連城之璧有味其旨固難和於大羹無德以將敢亟酬於雜佩銘膺感幸占對簡蕪

賀吳編脩

茲審疏青汗簡錫寵身章史官之具三長英髦慎簡聖經之法五始盛事特書荷針芥之偶投慶雲龍之胥會編脩內翰篤志精白結交老蒼審黃鐘於希聲灼知律呂嗜昌歎之古味允適酸鹹維懷寶而深藏終待價而一試筆耕云舊學殖焉窮桷師友川流獻文日墜喜而不寐類文子之同升樂以忘憂慨宣尼

於往昔斐然贊美蔑以效規

壽貢仲章

月暈虹蜺藹南漪之五色春浮花柳揆東作之平分孕彼玉人瑞茲寶運伏惟
某官池塘逸興金石流波懸弧表四方之心遠游結駟落筆擬千古之作長歎
彈冠愛東方之偷桃專北門而視草蓋將旬五日而後返抑亦一千歲以來歸
桡善頌莫陳雅游屢接沈香亭北行催芍藥之詞白玉堂前愧伴梅花之直薄
儀侑祝副穎瀆清

賀鄧善之脩譔

伏審儒林著望詞苑貪賢超近署之清班贊中朝之元化光膺異數允際重熙
敢緣肺腑之私庸寫胸臆之蘊切以王言之制始分於唐人文之精特盛於宋
故便於宣讀者必資諧叶而直以訓告者當務簡嚴作者數公流爲末派學疎
而才勝每師浩汗而失於麤疏記贍而思遲必慕數腴而拙於裁翦鳬鶴不續
蕭蘭莫分蓋洗金以鹽當研物理而攻玉必石有假朋從歷年滋多此道不競

藏名淵默莫窮龍虎之變騰處友善柔徒欣牛馬之奔走望風隨其臧否疾才
撫其短長有符東晉之清談自謂西都之舊作昔君實不爲四六語未嘗失朝
廷之尊而溫伯輒草廿二麻豈害爲錢穀之吏必此爲士其何敢言然作新斯
文是在吾黨復古之道誠惟今茲起八代之衰昌黎固專其事振五季之弊師
魯亦預有功樂在羣居道無孤立伏惟脩譔學士丰姿凝湛雅量輻深大音希
聲儼一獻九奏之意玄酒不和成百拜三行之儀中和養其本根英華發於情
性譬若夜光明月衆咸以爲寶珍方之威鳳祥麟人莫窺其形狀陳太丘之容
衆王茂弘之盡懽以爲黼黻帝猷曷取竟寧之事丹青神化獨追正始之音桷
幼講門功早親庭誥探諸老之源委不知者謂得異書道前賢之心期無聞者
猶譏曲說懼廢三槐之緒聊希五柳之恬爲可汰之技官守不求之樸論要蘄
傳後寧望敘遷欣覩除書缺脩賀記幸燈火平生之舊道江湖相忘之言人皆
曰賢亦旣遂彈冠之願老而能學當益思炳燭之勤敢效頌規斯爲處與

伏以豎燎扶朝陽之光敢居斧藻贈貂得明月之報庸謹襲緹三復先猷重陳
素款切以屬辭比事匪遵魯史之舊文微顯闡幽允正周王之大統無傳而著
惟道是明然而獲麟之箋有鄰神怪矢魚之訓詎止觀陳紛然賣餅之譏叢爾
垂旒之喻泥天正於長曆循夏五之闕文郊用辛而非長日之時禘尊祖而雜
圜丘之謬清言何補墨守徒矜投膠澄百尺之渾引髮舉千鈞之重首勳啖趙
心學邵程義理精明賴先儒之啓迪權衡輕重資前哲之贊揚嘗窺西周之簡
編深陋後王之典禮致太平者猶有羣議言五伯者殆無全人廢學熙寧卒致
爲戎之歎尊王慶曆遂多刻吏之嘲人物眇然年運而往伏惟大尹學士山林
圭組燈火詩書返袂高歌法天時於五始下帷坐授悟人事於三微載惟先正
細氈奏對之書是爲後學青箱纂輯之式集狐於腋端有假於翼成洗金以鹽
良永慚於癡索樛困學有志強仕無功百年雁塔之聯登季世龍門之末至轡
胥阜隸捫心有感於同時管鮑交朋掉首未逢於知己翕然針芥終以絲蘿萬
二千五百家爲鄉豈無好學二百四十餘年行事聿覩成書擁篲以陳袖函非

禮尚祈矜采俯賜鑒融

回趙太社鄉飲

習鄉上齒咸推大里之典刑隆禮尊賢幸屬貞元之耆舊矧蟬冕三公之地在
皋比一變之功人物眇然年運已往於粲雙魚之牘孔昭二馬之期入學祭典
脩願廣太平之盛觀升歌主人獻敢隨後進以同登

回趙太社

切以百人逐兔祇益苦心一朝解牛敢煩敏手念洛社久存於鄉約而杜陵或
廢其家聲宰肉莫均拔毛不與仰止金刀之禮樂陳茲典午之春秋無以易堯
不如歸趙粲飛函而禮讓堅縮袖以勞謙君子是憂貪人斯幸潛魚畏餌雖自
潔於水中羣蟻慕羶卒相緣於堂上其爲計則得矣獨竊議其可乎難以立談
終祈臥治匏五石而無用其果不能粟萬鍾以何加顧茲可陋僉謀懇切童瀆
矜融

壽徐德剛

七月八日

涼生兔子瑞應麟兒玄祖流芳歲遠猶傳其玉硯黃姑停宴夜分端俟於銀津
家聲之克振可覘宅相之深期有在桷陳人愈拙妙語莫工望閭里之葱葱阻
舟航而耿耿九五一曰壽願益窮皇極之書四十不動心矧已開中年之衰薄
儀侑祝善頌增情

謝程承旨

爵人於朝已甘遜避譽髦斯士忽被選掄小己惟驚大鈞有自切以王言之制
炳若日星帝令之行潤如風雨三代訓誥誓命之作理雖同而體實殊累聖歲
月日時之編事若近而書貴備簡嚴足以成信史清切然後爲人才非甚長
藝莫能擅皇明啓御文治興圖漆書汗簡之奇來者不絕金泥玉檢之陋卻而
未遑寬大之詔數頒遺逸之聘屢舉宜得鴻碩以贊雍熙大鵬乘風乃鸞鳩之
斯集長鯨失水顧螻螳之所凌憫涇渭之孰分慨薰蕕而同置拾芥而取青紫
彼謂不難相馬而視玄黃曷云有遇炙手可熱涌氣如山生能齊言豈莊嶽之
所變恥與噲伍何淮陰之過高惟末俗之實繁斯南士之不競離明有照渙汗